





九國志卷七

宋路振撰

後蜀

高祖 二十八年 後唐同光三年 入蜀 至後主 廣政

高祖

姓孟名知祥字保口邢州龍岡人晉王弟克讓壻也

後主

名昶字保元初名仁贊知祥第三子明德元年七月

丁卯嗣位不改元仍稱明德元四年改廣政至二月  
封秦國公越王全斌軍至城下出降五月至汴京改  
七年追封楚王葬洛陽

趙季良

季良字德彰濟陰人父允唐穀熟令季良幼涉書史長於吏治

九國志

卷七

後蜀

一



尤擅騎射王檀聞其名辟為保義軍節度推官楊師厚鎮鄴署元氏令徙魏州都督府司錄參軍後唐莊宗入鄴召見與語以季良有文武才略即授大理評事依舊司錄參軍充義勝都指揮使軍中謀議多以諮之時兵革屢興屬邑租賦逋久一日莊宗召至切責之季良對曰殿下何時當平河南莊宗正色曰爾掌輿賦而稽緩安問我勝負乎季良曰殿下謀攻守復務急徵一旦衆心有變恐河南非殿下所有莊宗歛容前席曰微君之言吾幾失吾大計自是益加禮遇遷興唐府少尹司錄參軍如故嘗夢手扶御座自謂輔佐之象繇是頗述天時人事以諷莊宗深納其言及即位授光祿少卿兼洛南水陸營田都制置

使明宗即位遷太僕卿會宰相任圜魚鹽鐵事薦季良為判官明年授檢校戶部尚書為西川官告使兼三川都轉運制置使知祥素重其名一見遂悅奏留為節度副使累表不許會李嚴來為監軍知祥深懷疑慮乃誅嚴而署季良為副使天成三年明宗下詔徙季良為果州團練使知祥匿其詔書密上表留之明宗不能奪請允其請自是傾心接待情好款洽或入謁稍晚知祥必顧左右曰副使來何遲也及至則讌語竟日每有謀議毋不見從時朝廷以夏魯奇李仁矩分鎮遂閬季良言於知祥曰朝廷增兵二鎮張犄角之勢將有不測之變也公處親賢之地以忠信見疑儻失先機則禍不旋踵矣知祥曰計將安出季



良曰我甲兵雖衆然而勢孤易動請與東川董璋合從先平遂  
闔則朝廷兵至我無內顧之憂矣知祥從之及王師入劔門而  
遂闔已平果無功而還及捷書至知祥匿之謂季良曰北軍漸  
邇奈何季良曰北軍至縣州已來必遁知祥問其故對曰縣師  
千里饋運不繼彼勞我逸不走何待知祥大笑以捷書示之及  
克黔夔二州以季良為武泰軍節度使董璋率衆入廣漢知祥  
領兵拒之季良留守成都制置經度軍用無闕先是季良嘗與  
知祥從容語及璋植性狠戾下多怨憤若監守一城攻之難克  
矣及聞璋起兵知祥憂形於色季良曰璋不守巢穴自來送死  
此天以璋授公也俄而璋果敗加檢校太保明宗崩知祥建號

加特進守司空平章事宏文館大學士判三司昶襲位加守司  
徒領山南節度使行興元尹廣政九年卒年六十四諡文肅季  
良性寬厚居常無喜愠之色母早亡事從母如所生季札季友  
皆從弟也並致位清顯所上遺表言不及私蜀人韙之卷一萬  
八千一

百三十六  
第九頁

### 趙庭隱

庭隱開封人世為卿家庭隱少知兵律尚氣義始事梁祖子友  
亮因擊鞠墜馬死庭隱董璋等十數人皆追赴汴州知其無過  
竟釋不問令給事左右末帝即位唐莊宗入鄴兩河對壘十有  
餘年時庭隱為邢州都監累立戰功節度使劉重霸嫉之誣庭



隱將所部兵降於莊宗因械送汴州末帝知其非罪又重違邊臣之請乃貶庭隱於南陽未幾追復舊職王彥章守中都庭隱在其軍中及彥章敗庭隱為莊宗所獲將以就戮大將夏魯奇奏曰此矧也其材可用遂釋之魏王繼岌討西川以庭隱為先鋒監押自入敵境即禁兵士燒廬舍剽財物蜀人德之魏王平成都錄其功奏授左廂馬步軍都指揮使知祥至蜀康延孝陷漢州遣庭隱率兵擊破之擒延孝檻送闕下知祥奏加檢校司空漢州刺史因留屯成都長興初明宗將議伐蜀乃以夏魯奇李仁矩分屯遂閬以分其勢知祥令庭隱與李仁罕張業率步騎十萬經畧遂閬魯奇堅壁不出戰會唐師入劔門知祥急召

庭隱令統銳兵五千至東川與董璋合軍以拒之至中路大寒士卒不能前庭隱撫諭勞問將士皆奮遂營於普安深溝固柵以養銳一日唐師奄至又分兵斷三亞父水及土橋庭隱密遣軍中善射者五百人伏唐師之歸路乃領軍出營久而不戰至暮唐師退庭隱縱兵追之伏兵齊起表裏合擊唐師大敗初唐師之入劔門也內有堅壁外有勅敵遠近震駭及庭隱之捷人心乃安知祥遣使慰勞賜書以褒之明年別將平魯奇唐師至葭萌而還庭隱班師知祥親勞於郊翌日至其第錫賚甚厚即授昭武軍節度使留後以鎮遏葭萌知祥送於北郊親舉觴以勸之在鎮踰月上言三泉餘寇盡去乞假一旅之師以拓漢中



及秦鳳之地知祥答書慰勉且令休息董璋襲廣漢將攻成都時東川廩藏充實部下多敢死之士其來也衆皆畏之知祥親督諸將召庭隱為副以率勵士旅璋遺書庭隱而詐達於知祥以書投庭隱投書褚中曰此必反間之辭不足觀也竢擒董璋而後閱之與璋戰雖縱橋前頗為所挫庭隱偽遁璋逐之知祥與公鐸領兵繼進璋軍亂不成列庭隱後整陣與知祥公鐸合擊之璋軍大敗斬首千餘級璋領數騎遁歸東川為部下所殺庭隱追至東川頓兵城下以待知祥梓州平以庭隱為節度使會李仁罕自遂州至求領東川庭隱將讓之知祥以庭隱功多且怒仁罕之貪復遂自領兩川節度使以庭隱為保寧軍節度

使以閬果蓬渠開五州隸之昶襲位李仁罕求總六軍將圖非望以庭隱為六軍副使以制之未幾仁罕誅改衛聖諸軍指揮使明年移鎮東川廣政初加中書令庭隱久居大鎮積金帛鉅萬窮極奢侈不為制限營構臺榭役徒日數千計十年被病懇讓兵柄疏再上從之仍就第冊為宋王經歲不能起賜肩輿入朝既謁見昶感動涕泣賜金沃盥及繒錦加太師卒年六十六子崇祚崇韜卷一萬八千一百三十六第十頁

### 趙崇韜

崇韜少驍勇有父風累從征討有功署副兵馬使及庭隱卒昶以崇韜領衛聖諸軍使以襲父任廣政二年周師復至境上昶



以崇韜與控衛指揮使袁可鈞同為北面招討崇韜率勵將士  
行陣整肅士卒有點其額為斧形者號曰破柴周師前鋒屢為  
崇韜所破至歸安而退二十七年王師來伐崇韜與李廷珪等  
率兵拒之遇王師於漢源崇韜策馬先登我師大敗崇韜力戰  
不止兵器皆斷折猶手擊數人為王師所擒

卷一萬八千一百  
三十六第十一頁

### 張業

業開封浚儀人性沈厚有果斷事梁為東頭供奉官時兩河兵  
革未息業頻領監護之任皆立戰功法令峻整士卒畏之莊宗  
入洛聞業有幹畧擢為列校繼歲伐蜀以業監先鋒兵補右廂  
馬步軍都指揮使蜀平以所部兵駐成都知祥入蜀奏授檢校

司空簡州刺史時蜀漢盜賊羣起燒劫鎮戍百姓驚擾知祥追  
業率兵捕之業令五家為小保五十家為大保旬日之內擒獲  
殆盡討夏魯奇於遂州以功授寧江軍節度使兵馬留後董璋  
襲成都業在夔州聞之率所部赴難東川平正授節鉞加檢校  
太傅明德初領右匡聖步軍都指揮使會武定興元兩鎮來附  
令業將兵二萬屯漢水業至褒梁分布寨柵控扼駱谷秦鳳諸  
隘會武定軍衙將與蒲谷鎮將任漢謙同謀導晉師入武定業  
遣戍卒擊走之昶襲位改武信軍節度使同平章事是歲昶殺  
判六軍事李仁罕業仁罕之甥也昶慮其為變詔歸本道未幾  
召入依舊同平章事兼判度支新收征稅多為主吏乾沒業作



盜税法犯者十倍征之吏民不堪其命業多視事私第中宰相之門被桎梏者常滿祖知之遽除十倍之法業子繼昭好擊劍嘗與淨衆寺僧歸信同訪劍術士右匡聖指揮使孫漢韶與業不協告業與繼昭同謀不軌翌日令壯士就都堂擊殺之年五十七

卷一萬八千一百三十六第十一頁

### 武漳

漳字巨川太原文水人父玉汾州別駕漳少勇敢善騎射事莊宗為定塞都虞侯莊宗以全軍援澤潞漳與裨將數攻其別寨斬首千餘級擢太原衙前兵馬使改匡聖軍指揮使同光初從魏王繼岌入蜀因留成都知祥鎮蜀補衙內右第二指揮使天

成初漳與張公鐸迎瓊華公主於北都中國兵革之後盜賊充斥漳被堅執銳通夕不寐至蜀改左第二指揮使奏授檢校僕射其後東討果閬北拓劍利漳屢有功授縣州刺史知祥開國改邛州遷山南節度使漳以褒中用武之地營田為急務乃鑿大洫以導泉源溉田數千頃人受其利入為奉饗肅衛指揮使未幾改山南加同平章事廣政七年卒於治所年六十四漳質厚儉約所至有治迹俸入之外不營貲產蜀人稱之

卷一萬八千一百三十六第十一頁

### 李肇

肇汝陰人父璟唐神策兵馬使肇少以材勇從父征伐後隸宣



武軍補左建牙都頭累轉陝虢馬步軍都指揮使莊宗平梁恢復平洛割宣武一軍隸於河東時知祥為北京留守待之甚厚同光中以所部兵從魏王繼岌討蜀蜀平班師康延孝至普安叛擁眾回據廣漢肇在其伍中延孝敗肇被俘而知祥親釋其縛擢為衙內都指揮使未幾奏授嘉州刺史長興初我師圍夏魯奇於遂州唐師來援劔門不守肇領兵赴普安以拒唐師不得進以功改漢州刺史駐軍緜谷明年董璋率兵攻成都軍勢甚盛遣使致書於肇諭以禍福肇素不知書擲之於地曰此不過勸我叛爾因并其使殺之梓州平加昭武軍節度使昶襲位肇以足疾不即時來朝昶怒罷其兵權授太子少師致仕於邛

州安置瘴坎不得意廣政八年卒年七十

卷一萬八千一百三十六第十三頁

李仁罕

仁罕字德美陳留人少隸宣武軍為小校容貌瓌偉梁祖為四鎮節度署為衙內昭宗幸鳳翔梁祖遣仁罕奔問行在因修貢禮梁祖革命補宮苑儀鑾等使歷許蔡華三州馬步軍都指揮使莊宗伐蜀令監先鋒軍知祥領鎮奏授馬步軍都指揮使康延孝叛知祥命仁罕討平之以功授彭州刺史遷蜀州夏魯奇鎮遂州稟朝廷之命繕治甲兵將圖蜀知祥與董璋謀先討魯奇令仁罕攻遂州拔之以仁罕為兵馬留後未幾承制授武信軍節度使又以所部兵定三峽走夔將安崇院知祥卒遺命仁



罕輔政昶嗣位令判六軍事仁罕奉幼主無隱情自以先朝舊老遇事必諫時控鶴指揮使張公鐸內醫韓繼勳豐德庫使韓保貞弓箭庫使安思謙等皆昶在東府時舊所親狎素不為仁罕所禮皆懷怨怒每譖仁罕欲納王衍妃徐氏為側室遂誣以姦昶大怒俟仁罕入謁令武士擊殺之年六十二卷一萬八千一百三十六

### 李延厚

延厚涪州平恩人父及唐邢州別駕延厚少有膽畧善騎射從父琮為涪州節度使率眾歸於梁祖延厚亦從焉梁補左拱辰指揮第二都頭後唐同光中以所部兵從魏王入蜀改馬軍右

驍銳第一指揮使康延孝入漢州知祥遣延厚率精兵二千會李仁罕往討之將行延厚集將士於營中誓之曰今出師征討不三旬必破賊乃立功圖賞之日也士卒有誓國報恩不以家為慮者立東廂衰疾怯懦厭為征行者立西廂無自苦也得請行七百人逐延孝西寨斬首百餘級竟拔其城以功奏授檢校右散騎常侍改右廂馬軍都指揮使歷陵果州刺史源州押衙文環琛叛延厚討平之岐軍逼文州延厚率兵赴援即日解其圍昶襲位遷雅州刺史永平軍節度使未幾移鎮昭武軍廣政

九年卒年六十一卷一萬八千一百三十六第十四頁

### 張公鐸

九國志

卷七 後蜀



公鐸太原樂平人父頊唐儀州兵馬使公鐸身長七尺侷儻有節義好文史之學知祥為北京留守錄為親從及出征成都補為牙校從高敬柔迎公主於晉陽轉義勝定遠都知兵馬使董璋舉兵襲我廣漢先鋒兵將至成都公鐸率諸軍從知祥逆戰於雞蹤橋公師不利公鐸率所部兵力戰直衝其腹璋兵大敗梓州平以功授簡州刺史遷奉聖控鶴都指揮使知祥病公鐸與趙季良趙庭隱李肇等同受遺命輔政昶襲位授保寧軍節度使為政嚴猛寮吏畏憚時承前蜀之弊獄訟繁多案牘堆積公鐸量其所犯隨意裁決無不稱當在位六年民被其惠先是屬邑連歲多逋租公鐸詰其由乃豪民猾胥乾沒賦稅時令佐

已有授代者公鐸悉勒止之令盡徵其租而後解由是不數月徵錢糧數萬貫斛時論以為嚴而不殘遷寧江軍節度使公鐸馭下嚴正宿衛二十餘年宮禁寧謐初染心疾昶憂之為玉局洞開靈寶壇親署青詞以醮焉廣政八年卒年六十二卷一萬八千一百三十六頁十五頁

張虔釗

虔釗遼州榆社人父簡唐檢校尚書左僕射虔釗少以武勇事唐武皇莊宗之世累補左右突騎軍使莊宗嘗以偏師取鎮陽命虔釗率騎果為前鋒屢挫賊銳遂陷其城明宗即位以虔釗有將帥才擢為隨駕親征都指揮使歷遼春二州刺史天成中



鎮定節度王都阻兵連結契丹為邊患命虔釗為北面行營兵馬都監進討契丹殺傷甚衆虜不能南下遂圍定州百日而城陷斬王都降其餘衆師還以功遷橫海軍節度使未幾移鎮山南兼西面諸州馬步軍都部署應順初閔帝即位以鳳翔節度使潞王從珂有異志發兵討之詔虔釗為犄角師次岷陽人心離散降於從珂虔釗憤之乃退歸南鄭率孫漢韶以山南之地納款於蜀知祥遇之甚厚委以節度昶襲位加中書令歷左右匡聖馬步軍都指揮使出為昭武軍節度使及漢祖即位乃移鎮梁州以觀朝廷之變會晉昌軍節度使趙匡贊鳳翔節度使侯益俱謀歸蜀遂以虔釗為北面行營招討使應接經畧俄而

趙匡贊侯益請昶出師掠定三秦因命虔釗與韓保貞等總師五萬出散關雄武軍節度使何重建出隴右奉鑾肅衛都虞侯李廷珪出子午谷會於雍州廷珪始出子午谷聞匡贊為王景崇所逼棄城自拔東去遂先退師時虔釗福誠保貞師次陳倉謀不相協而侯益聞匡贊已去廷珪班師亦誠欵中變閉壘不出司天監趙廷樞累以雲氣候不利諷於保貞保貞惑之乃與福誠率所部取隴州道會重建歸蜀虔釗留寶雞以勢孤不可深入遂班師士卒夜發部伍不整至興州自以功業不成感情而卒年六十六

卷一萬八千一百三十六第十五頁

潘仁嗣



仁嗣浮陽東光人父廷訓密州都指揮使仁嗣少儻尚氣起家為保義軍兵馬使後唐魏王繼岌西伐仁嗣以所部兵從入蜀蜀平改左右廂馬步軍都指揮使知祥受節鉞留在麾下康延孝襲漢州知祥遣仁嗣率兵救之連破數寨遂屯於漢州董璋興兵趨成都城外皆為敵境仁嗣以所部兵陣於赤水璋以全軍二萬擊之仁嗣大敗以十數騎潰圍而出身被十餘創卧於血中及璋敗獲免知祥親至其第以藥傅之明德二年奏授武定軍節度使源壁等州觀察營田處置等使之任卒於成都年四十六

卷一萬八千一百三十六第十六頁

龐福誠

福誠河東太谷人少善騎射僮僕交結豪俠傾竭家產中原兵亂福誠聚徒鄉里剽掠縣鎮知祥為北都留守署昭為太谷主簿令招諭福誠因相率歸附從知祥入蜀補衙內指揮使王師陷劔門從趙庭隱率兵據石橋福誠夜領兵數百人循水次東北上山攻王師夾其腹背王師不虞其至舉軍驚擾因奪擊破之以功遷茂州刺史知祥建國加檢校右散騎常侍袒襲位歷資縣印三州刺史奉鑾肅衛馬步軍都指揮使會張虔釗經畧秦中以福誠為行營馬步軍都虞侯克寶雞分兵吳山進攻隴州以歸改左驍騎軍都指揮使武寧軍節度使廣政十五年授衛上將軍以目疾罷卒年七十一

卷一萬八千一百三十六第十六頁



李彥琦

彥琦字子溫京兆長安人本姓楊氏祖父皆隸神策軍彥琦善騎射有權畧唐中和初鳳翔李茂貞委以心腹之任易姓李氏齒於諸子後昭宗西幸梁祖迎駕攻逼岐下者累年及昭宗東還長圍方解大軍之後府庫空竭彥琦請使甘州以通回鶻往復二載美玉名馬相繼而至所獲萬計茂貞賴之劉知俊自靈武班師路經長城嶺梁將率精銳數萬躡其後彥琦與俊同設方畧擊敗之潞王之守岐下也諸道將急攻其壘彥琦時在圍中罄家財以給軍用潞王篡位以功授檢校太傅知河陽軍府事俄授鎮州兵馬留後後晉祖入洛彥琦罷職西歸家財素厚

乃閉關自奉游心釋氏專務散施廣政十年王景崇納欵於蜀彥琦因歸成都授左將軍維州刺史卒年八十八卷一萬八千一百三十七

第二頁

孫欽

欽幽州安次人性忠烈善騎射少遇亂隸安義軍節度使充衙內都頭後改補合州衙內都頭兼土客都虞侯從本州刺史徐章入蜀會知祥鎮成都長興初轉充右截山都頭董璋來寇戰雞蹤橋有功遷普州刺史昶襲位累遷東川武德軍左奉聖都指揮使廣政十五年令以所部兵北征欽將行白於都監王承丕承丕將謀亂欲害判軍府事郭廷鈞曰詰朝當領卒二千人



介胄閱於雄義營欲與府公觀之欽未知其由從容謂承丕曰卒閱習舊乃木刀竹槍今都監令執帶器甲將士臨行又是詔旨或有不虞如何承丕遂止又明日欽已具行裝入辭承丕承丕不止之同詣府中謁廷鈞及廷鈞送承丕上馬承丕頤指數卒擊殺廷鈞自稱准詔處置軍府事即據府廳指揮放諸司罪人分遣將校領兵屯果閭縣劔州拒守劔門關發帑廩以賞將士自辰至己巳命之徒應募而至者千餘人明日大會將校寮屬欽言於衆中曰郭廷鈞既抵朝憲遠近未知其由公授命權總留務願出詔書以示軍府承丕曰作好官何問詔書欽知其已叛乃給之曰州城内外人情未安願為公督部下兵以伺察之

因躍馬而出承丕連呼不止馳至本軍立召將士告其事遂率衆徑趨府中承丕左右皆驚散因擒斬之傳首成都加檢校太子賓客二十五年寢疾卒年七十二

卷一萬八千一百三十七第一頁

### 何重建

重建其先回紇之別部居雲朔間祖允慶父懷福從後唐武皇世著勲闕因家於太原重建初事晉祖為奉德馬軍都指揮使歷驩睦曹三州刺史檢校司徒會延州節度使丁審琪殘暴貪冒蕃部苦之重建以所部兵攻其城審琪遁去晉祖即以重建權節度兵馬留後下車諭以威福邊民安堵就加彰武軍節度使累遷涇鄜貝澶孟五鎮節度使皆以廉儉簡易稱未幾移鎮



秦川廣政十年契丹犯中原虜使齎偽詔至重建不勝其憤謂  
將吏曰吾事石氏二主八擁旄節人臣之榮已極矣豈能交臂  
以事戎狄乃斬其使以秦成階三州歸款於我昶遣右千牛衛  
上將軍李繼勳馳往慰諭賜予甚厚加特進同平章事依前雄  
武軍節度使時果鎮與鳳州未平重建悉經畧討平之昶大舉  
兵北伐遣張虔釗出大散關以重建為招討使由隴州路以進  
師無功而還堅請入覲昶不許二十一年加兼侍中卒年六十

九卷一萬八千一百  
三十六第十二頁

孫漢韶

漢韶太原人祖昉唐嵐州刺史父存進振武節度使漢韶幼有

氣局風儀峻整存進尤愛之起家安定軍使知祥留守晉陽屬  
蕃渾侵擾邊郡表令漢韶督軍進討莊宗知其可用遂委以戎  
律大破虜寇擒獲甚衆以功授檢校右僕射蔡州刺史明宗即  
位遷彰國軍節度使觀察留後累遷昭武武定等軍節度使閔  
帝嗣位加特進漢韶以其父名上表讓之改檢校左僕射制曰  
改會稽之字抑有前聞換瓌寶之文非無他事及潞王入洛遂  
與張虔釗等奉表歸附及謁見與知祥敘汾上舊事及洛中更  
變相對感泣知祥曰豐沛故人相遇於此何樂如之於是賜第  
宅金帛供帳什物悉官給之授永平軍節度使昶襲位加同平  
章事明德三年入為匡聖馬步軍都指揮使廣政十年為山南



節度使會何重建以秦階成三州歸附鳳州石奉頽堅守不通  
我使昶遣漢韶入城宣慰號令嚴肅秋毫無犯駐數乃還加檢  
校太師雄武軍節度使後以疾乞解兵柄封樂安郡王賜肩舁  
入謁卒年七十二漢韶忠勇有父風而重厚過之居藩閫皆有  
治迹始以去危即安委質於我頗竭股肱之力終保富貴識者  
多其淳慤

卷一萬八千一百  
三十六第十二頁

### 高彥儔

彥儔太原人少善騎射慷慨有大節知祥留守太原召為軍校  
從入成都授親衛指揮使昶襲位遷茂州刺史廣政十年秦州  
何重建以城降以彥儔領雄武軍節度使領衆守其城未幾召

歸領右衛聖馬步軍都指揮使十八年周師攻秦鳳以彥儔為  
北路行營招討使與李廷珪呂彥琦率兵赴援與周師遇於唐  
倉大戰我師敗績彥儔退保青泥嶺周師遂克階成秦鳳等州  
彥儔歸成都昶釋不問改寧江軍節度使二十七年王師來伐  
分兵由峽路入夔州彥儔謂副使趙宗濟監軍武守謙曰北軍  
涉險遠來利在速戰宜堅壁待之守謙曰寇據吾城下而不擊  
將何待也乃獨領麾下千餘人以出時王師頓白帝廟西遣騎  
將張廷翰引兵與守謙戰我師敗走廷翰乘勝登城彥儔整衆  
將出拒戰王師已乘而入彥儔力戰於城下不勝身中十餘槍  
左右皆散去彥儔奔入府中反拒其門判官羅濟勸彥儔單騎



歸蜀彥儔曰我昔已失天水今復不能守夔州縱不忍殺我何面目見蜀人乎濟又勸其降彥儔曰老幼百口俱在成都以一人偷生舉族何負今日止有死爾即解符印授濟曰君自為計俄而王師壞門彥儔挺劍拒之殺十餘人於是登樓縱火自焚而死大將劉光又憐其忠蓋收其骨以葬焉

卷一萬八千一百三十六第十二頁

### 李廷珪

廷珪太原人幼慧黠七歲隸知祥帳下為給使從入蜀為牙軍指揮使征康延孝有功遷陵州刺史知祥征東川廷珪權領親軍以從董璋平轉資州刺史累改眉蜀二州刺史昶襲位遷捧聖控鶴都指揮使領興元節度使歷雅遂閬三鎮加兼侍中廣

政十八年周師攻秦鳳以廷珪為北路行營都統高彥儔呂彥珂為招討廷珪遣先鋒指揮使李進以兵據馬嶺分兵出斜谷營於白澗將腹背以攻周師又遣染院使王巒領兵出唐突與周師遇我師敗走王巒死之而馬嶺斜谷之兵聞之皆退奔高彥儔與諸將謀退守青泥嶺由是秦鳳階成之地皆陷於周矣廷珪上表請罪昶釋不問明年來朝遷左右衛聖諸軍馬步軍都指揮使仍分衛聖步騎為左右十軍以武定軍節度使呂彥珂為之使並隸於廷珪二十八年王師拔劍門加廷珪太子太傅令從元詰統兵以拒王師至緜州聞王昭遠趙崇韜之師皆敗元詰懼退保東川翌日奔歸成都所過盡焚其儲蓄及王師



入成都行營都監王仁贍按籍詰所在軍資將歸罪於廷珪廷珪問計於步將康延澤曰吾觀王公志在聲色苟足其欲則置而不問矣廷珪素儉約不蓄妓樂遂求於姻戚家得女妓四人復假貸金帛直數百萬以遺仁贍繇是獲免歸朝為右千牛衛上將軍卒卷一萬八千一百三十六第十三頁

### 王彥銖

彥銖太原人祖義方汾州長史父德誠贈太子少保彥銖性仁弱不好弄讀書究大義天祐中事知祥於太原後入蜀累補節度押衙詔使李彥之為監軍也密懷異謀知祥數其過命彥銖擒斬之嚴之左右無敢動者知祥破董璋擇心腹有權畧者俾

獲其軍於是以彥銖為東川監押及建國轉授右僕射昶襲位歷蓬嘉雅三州刺史出為山南兵馬都監數載罷歸補左右羅城使眉州刺史遷昭武軍節度使轉右衛聖軍都指揮使罷歸改左金吾衛上將軍復授昭武軍節度使廣政二十四年卒於治所年六十五卷一萬八千一百三十六第十六頁

### 李奉虔

奉虔太原人本姓王氏祖欽唐隰州刺史父存賢佐唐武皇累著功因賜姓李氏梁人攻上黨莊宗親總大軍以援存賢先登陷州授盧龍軍節度使奉虔幼有才畧不循小節年十四為幽州衙內都指揮使居父喪骨立數歲及知祥鎮蜀奉虔懇請從



行補廳直左押衙明宗即位充貢奉使諸將進攻遂寧王師掩至劔門不守知祥命趙庭隱督兵往拒之署奉虔為兵馬監押時衆寡不敵人心動搖奉虔與庭隱率勵士卒竟敗王師以功授檢校右僕射昶襲位領嘉州刺史文思使遷右金吾衛大將軍為昭武軍都監屬夏秋多雨嘉陵江溢出城奉虔置堰開濶瀨二十餘處洩其蓄水築堤以護之城池克完人被其利授昭武軍節度自監護擁節旄自奉虔始人皆榮之入為左右街功德使卒年六十二

卷一萬八十一百三十六第十六頁

### 王昭遠

昭遠成都人幼孤貧年十三依東都僧知誣為童子知祥入蜀

飯僧於府署昭遠持巾履從知誣得入時昶方就學見昭遠聰慧留給事左右昶嗣位以為卷簾使遷諸司使會樞密使王處回得罪乃以昭遠為通奏使知樞密事機務一以委之府庫財帛恣其所取不問未幾遷山南節度使判官張廷瑋言於昭遠曰公素無勲業一旦位至樞近不自建大功何以塞時論莫若遣人致書通好并問令其發兵南下我即自黃花子午谷出兵應之使中原表裏受敵可坐有關右之地則君之功無有出其右者昭遠然之乃言於昶遣人問行齋蠟書以往太原為疆吏所獲及王師來伐昶令昭遠與韓保貞趙崇韜等領兵以抗王師昭遠好讀兵書頗以將畧自任始發成都昶遣宰相李昊等



餞於郊外昭遠酒酣攘臂而言曰是行也非止克敵當以此數萬彫面惡少取中原如反掌爾及行執鐵如意指揮軍事自方諸葛亮時王師已破劍門昭遠大懼俄與王師遇於漢源趙崇韜布陣將戰昭遠據胡牀不能起崇韜敗乃免胄棄甲走投東川為追騎所獲送闕下授左領軍大將軍開寶中卒卷一萬八千一百三十六第十七頁

### 安思謙

思謙并州人幼事知祥於太原以勤恪聞知祥入蜀補為軍校昶襲位頗見親信歷簡邛彭三州刺史奉鑾控鶴馬步軍都指揮使武泰軍節度使未之任改左匡聖馬步軍都指揮使山南

節度時鳳翔監軍王景崇以城歸順命思謙率兵應接且畧地關中會漢兵圍鳳翔燒其雙門景崇遣使來求救昶遣思謙及韓保貞等率兵救之兵次右界漢兵屯寶雞城思謙令保貞分兵趨隴州逼汧陽以分其勢又遣先鋒將申貴等分兵走摸壁設伏時家林貴以數百人晨壓寶雞列陣以誘漢兵漢兵爭出戰貴偽遁漢兵逐之為伏兵所擊退入寶雞城思謙次渭水將引軍濟會羅喉保義軍與東相應掩我不備多殺士卒而漢兵復振思謙與諸將議曰糧儲將盡而賊勢且盛不如釋之以圖後舉遂班師十二月景崇又來告急昶復督思謙令進兵思謙請先運糧四十萬斛然後進軍昶覽表不悅謂左右曰古之良



將因敵取資近者契丹以數十萬衆入中原豈先事飛輓耶揣  
思謙此意必不為朕進取也乃發興州乾渠渡糧食及山南諸  
倉米數萬斛屯鳳州以益之思謙不得已遂進軍次大散關申  
貴以所部先進擊漢兵燒箭筈寨毀閣道遁去貴盡銳追之及  
安都思謙進軍玉女潭又殺漢兵千人漢兵退屯寶雞城思謙  
駐軍摸壁時保貞之師攻隴州不能下思謙遂遷延不進會漢  
兵陷鳳翔景崇死乃班師上表待罪昶釋不問召歸移鎮閬州  
仍留宿衛思謙以受任無狀為物議所薄頗不自安昶既誅張  
業宮禁門衛悉加嚴警思謙以其疑已頗惡之言多悖慢三子  
宸嗣倚恃父權恣橫國人畏之會翰林王濬乘間奏思謙出怨

言將圖不軌昶懼翌日俟其入朝伏壯士擊殺之并其三子廣

政十七年也

卷一萬八千一百三十六第十七頁

焦彥賓

彥賓字英服滄州清池人父軫唐兗海節度使彥賓少聰敏多  
智畧事後唐武皇尤所委信及莊宗即位遷左監門衛將同正  
四方館使出護邢州兵知祥移鎮成都詔以彥賓為監軍使與  
知祥同入蜀康延孝據廣漢彥賓說知祥令召董璋與之協力  
討賊遂擒延孝明宗即位忿閻豎輩怙勢擅權先朝使四方及  
逃遁不出者皆就戮之死者殆盡彥賓為知祥保護獲免朝廷  
因以李嚴代之彥賓辭疾不歸朝知祥因令判都提學院事未



樂轉左驍衛上將軍以年老乞代從之彥賓乃營別墅鑿池沼  
植蒲莖養魚以自給昶襲位以先君舊友命全給俸祿而不令  
覲謁俾遂其性廣政十五年卒年七十八卷一萬八千一百  
三十六第十八頁

### 趙進

進定州人少以膽勇隸天雄軍籍時河北宿兵進累戰有功洎  
莊宗入洛猶在行間屯於清廩祿既薄又不時給士卒多怨憤  
思亂者十七同光末與本軍皇甫暉等共推逼趙在禮相率夜  
犯鄴城城中士卒莫有鬪志進等因陷其城未踰旬兵數萬在  
禮署進衙內都虞侯三城巡檢使莊宗遣元行欽以其言聞因  
詔明宗馳往招諭及入城乃共推戴遽有洛中之變天成初除

貝州刺史鄴都衙內指揮使明年移典寧州屬慶州叛遣進討  
平之遷雅州刺史知祥入蜀進來覲謁知祥以進始謀叛逆將  
誅之進大懼趙季良諫曰莊宗季年天下思亂匪獨貝衛一境  
公國之懿親所宜責以干紀加其顯戮進自知必死歸命於我  
所宜撫納以責其後效知祥納之董璋之亂我師致討進戎服  
謁見而言曰進荷明公不殺之恩今日有所報矣請前蹈白刃  
決命破賊乃署為前鋒監陣使先登立功璋平轉左衝山指揮  
使昶襲位歷忠鳳邛普四州刺史左匡聖步軍都指揮使所至  
軍政修舉戍卒有疾苦者必撫問周悉當盛夏沍寒未嘗勞役  
將士以此樂為之用廣政十七年督部兵戍漢中逾月以疾聞



召還卒於道年六十一卷一萬八千一百三十六第十八頁

### 石處溫

處溫萬州人本波斯之種仕前蜀為利州司馬同光中知祥入蜀補萬州管內諸壇點檢指揮使率義兵同收峽路時通州大將王允瓊侵擾邊鄙及州寇杜景溫劫東鄉豪殺縣令牟孟剽掠戶口焚燒村落處溫與諸軍討平之知祥遺書褒美轉寧江軍節度都知兵馬使萬州管內義軍都指揮使昶襲位遷獎州刺史處溫初據石市招納亡命遠近多歸之由是廣事耕墾常積穀數萬十石前後累獻軍糧二十餘萬石加以寶貨昶嘉之加檢校司空未幾授萬州刺史移簡州卒年八十卷一萬八千一百三

第十六頁

### 孟思恭

思恭字近禮穎川人父彥暉嘗為許州獄吏前蜀王建嘗隸忠武軍坐事被繫謂彥暉曰卿為免我他日將厚報彥暉遂縱之令亡去及建霸蜀遣使迎之授簡州刺史遷漢州團練使思恭弱冠奇崛猿臂善射起家保信軍建嘗集文武射苑中思恭屢中的建大悅賜衣服以其女妻之為駙馬都尉累遷靜塞軍團練使王衍襲位為北路行營都指揮使知祥鎮蜀以其宗姓補先登指揮使以所部兵從董璋遣思恭分兵討集州誠之曰賊少則與戰賊多則退守要害我將濟師及遇賊思恭與之戰不



利退求濟師璋怒放思恭歸知祥免之明年隨趙庭隱破璋於  
雞蹤橋以功改清遠指揮使昶襲位加檢校司空改雄義都指  
揮使屯梓州累遷飛棹都指揮使歷劍階忠三州刺史思恭有  
膽畧善撫士卒廣政二十年為峽路行營都指揮使屯赤英山  
時秋暑未退思恭苦熟食冷物浴寒水致疾卒於任年七十二  
卷一萬八千一百  
三十六第十九頁

申貴

貴潞州人弱冠有勇力初事呂彥珂為帳下卒天成中歸於知  
祥累補定遠都頭從征伐身當矢石深為諸將之所推許改決  
勝耀武指揮使昶襲位遷右衛聖都指揮使歷昌渝文眉西州

刺史貴貪鄙殘虐所在聚斂財貨民不勝其弊典眉州受財鬻  
獄尤恣暴橫常指獄門謂左右曰此我家錢鑪其不道如此初  
兼五縣巡檢令其子元寶與州吏許延祺誣構民連賊枷禁以  
求賂被訴下獄責授貴維州司戶叅軍馳驛發遣至犀浦賜自

盡卷一萬八千一百  
三十六第十九頁



九國志卷七

九國志卷八

宋路振撰

東漢主凡二十九年 稱帝至英武帝廣運六年國滅歷四  
十國紀年及通鑑作北漢此與五代

同史

世祖

姓劉名旻初名崇後漢高祖母弟也為河東節度使  
乾祐三年隱帝遇弒郭威篡漢四年正月戊寅即位

睿宗

命在位四年薨年六十廟號世祖  
於晉陽仍用乾祐年號受契丹冊  
名鈞初名承鈞是次子受契丹冊命仍稱乾祐七年  
行三年喪服除改乾祐十年為天會元年至十二年  
七月戊申薨年四十三諡

少主

曰孝和皇帝廟號睿宗  
名繼恩本姓薛鈞養為子嗣  
位六十餘日為郭無為所弒

英武帝

名越五年改元廣運  
年越五年改元廣運  
降封彭城郡公淳化  
中薨追封彭城郡王

九國志

卷八 東漢



蔚進

進太原人少有膂力身長七尺日行二百餘里高祖鎮并汾進以材官給事及高祖領軍令負羈勒開運末南行留進於太原為崇翊衛即受馬步軍指揮使鈞襲位領建寧軍節度使典親軍如故繼恩建國郭無為受詔輔導世子無為與進不協出為代州刺史時無為專政繼恩潛欲圖之進知其必亂自以居親衛之地頗懷危感及有中山之命忤然即路未幾繼恩遇弒國人皆以進為先見以城納款歸朝授左衛大將軍領檀州刺史卒年七十二進無他能惟掌兵方嚴所至不敗事劉氏四主以質直聞歸老中國祿二千石亦武夫之終吉也

卷一萬八十一  
百三十七第二

頁

張元徽

元徽邢州武安人少以沈勇隸本城為兵累轉至列校高祖鎮并汾召置帳下累從征討有功晉開運末破契丹於三交以功授代州刺史歷雲州防禦使遷代州與崇素相友善及崇建號領侍衛親軍遷武寧軍節度使崇舉兵南下將圖周室以元徽為前鋒與周師遇於巴公原元徽以東軍先登陷陣擒監軍使一人降其步卒千人而旋崇大袞賞之元徽乘勝復入馬倒為周師所擒殺之其麾下十餘騎畢力血戰奪其尸而出俄而崇眾亦敗先是前鋒兵將次巴公一夕營中刀斗皆噉元徽急遣



詣崇大寨易之凡易數十皆嘖而不可擊因以白崇怒曰故要我金鈿耶遂止是夜有大星墜元徽營中明日果敗元徽沈厚  
有將帥材善撫士卒輕財好施雖爵祿豐厚而家無餘貲既而  
軍吏為立廟晉陽城西北隅塑其像歲時祀之見者必掩泣  
萬八千一百三十七第二頁

鄭進

進開封陽武人身長七尺餘驍勇多力漢祖鎮并汾以材官給  
事累從征討有功即位遷侍衛步軍都指揮使鈞襲位以先朝  
勲舊賜予甚厚進性慷慨重然諾好施家無餘貲繼元立馬峯  
典機密性鄙吝與進不協峯怒悉奪其兵柄進不堪辱詬之於

朝繼元怒翌日送定襄安置遣人殺之於路

卷一萬八千一百三十七第三頁

衛儔

儔吐渾族人少事鈞為蕃落小底善騎射驍果絕倫明書計通  
六蕃語鈞襲位遷如京使令專掌吐渾一軍以從征討所向多  
克捷虜援兵每至即遣儔居前鋒軍中凡布列烽燧措置寨柵  
皆儔為之繼元立為閹人衛德貴所嫉出為遼州刺史吐渾數  
千人遮道請留繼元不許自是一軍失帥不可復用矣儔少長  
蕃中不樂為郡頗出怨言繼元慮其為變潛遣人殺之

卷一萬八千一

百三十七第三頁

李隱



隱雁門人少以驍勇隸緣河十寨善騎射有膽畧鈞襲位以軍功擢授馬步諸軍都引進使累從征討性純直未嘗典事權要衛儔出知遼州隱惜其忠勇為倖臣所逐頗憤惋形於言德貴聞而惡之白於繼元即日送嵐州安置未幾殺之

卷一萬八千一百三十七

第三頁

九國志卷八

九國志卷九

南漢 唐天祐元年為廣州節度使至後主大寶十四年國滅凡六十七年斷自高祖乾貞元年為始凡四主實

宋路振撰

列宗

五年

姓劉名隱父謙為封州刺史有三子曰隱台嚴乾亨元冬謙卒士民謀亂隱誅之嶺南節度使劉崇龜表為封州刺史天祐元年朱全忠奏為清海軍節度使梁開平元年封大彭王三年改封南平王四年進封南海王乾化元年三月丁亥薨年三十八諡曰襄乾亨元年追尊曰襄皇帝廟號烈宗陵曰德陵高祖名襲初名巖又名陟謙庶子乾化元年五月甲辰梁以為清海軍節度使三年正月襲封南平王貞明二年仁曰太祖已稱帝建國號曰越元乾亨二年十一月改國號曰漢凡改元三乾亨九年白龍三年大有

高祖

康陵曰



瑒帝名玠第三子初名宏度封賓王改封秦王及嗣位

更今名改大有十五

中宗名晟初名宏熙封晉王既弒玠遂嗣位改光天二年

為應乾元年十一月丁亥改乾和十六年八月辛巳

後主

名銀晟長子初名繼興封衛王乾和十六年八月辛巳襲位改是年為大寶元年至十四年二月宋師入

城降封恩赦侯時宋開寶四年也八年進封彭城郡公太平興國初進衛國公五年薨年三十九追封南

劉洪操

洪操字貞度龔第九子洪澤之母弟也幼知書及長有識量大  
有中封萬王十一年吳權攻交趾咬公羨求救於龔龔欲乘其

亂而取之遣大將梁克貞率兵南下龔自護其軍以洪操為靜  
海軍節度使封交王令統眾趨白藤時吳權已殺公羨而據交  
趾親率軍來逆戰先於海口多植捷楸悉銳其首以鐵冒之潮  
水方漲權乘輕船引兵挑戰洪操逐之須臾潮退戰艦為捷楸  
所絀士卒皆覆溺死者過半遂擒洪操殺之卷一萬八千一百  
三十七第六頁

劉洪杲

洪杲字曰宣龔第十子母南儀謝氏名宜清有寵洪杲十歲封  
循王好步鬪復便弓馬以膽勇聞諸兄皆尚儒學或勸令讀書  
洪杲曰吾家立功立事皆起馬上獨使我老一經乎龔以兵書  
教之遂畧通義光天初循州賊遇自稱中天八國王擁眾數萬



攻下郡邑洪杲請統衆討賊玠以其尚幼不許洪杲曰兵法尚  
變不尚齒也因令越王為都統洪杲副之次錢帛館軍士方食  
賊衆奄至洪杲率親信數百人介甲躍馬徑入賊中殺數十百  
人賊為之少却俄而越王領衆繼至與賊大戰自辰至午賊衆  
益盛圍我師數重矢下如雨軍人多死洪杲矢盡挺劍力戰流  
血滿袖裨將萬景忻等蒙以大楯翼二王以出賊亦解去洪杲  
以戰功授桂州觀察使未幾與晉王同謀篡殺應乾初為諸道  
兵馬副元帥參政事晟初立國中謗議騰沸洪杲請歸罪於劉  
思潮等晟不從反為思潮等所譖以洪杲謀為亂晟遣思潮偵  
之一日洪杲與親信飲酒第中思潮與潭令裡領衛兵排闥而

入斬其首以徇

卷一萬八千一百  
三十七第五頁

蘇章

章封川人少事隱為牙將性忠厚有勇力從征譚玘盧琚有功  
薛王奏署衙內馬步軍都指揮使從隱討盧延昌於韶州隱率  
舟師出雙石會天大霧昏暝如夜韶人四出以鐵纜繫巨鉤投  
隱艦士卒驚擾章引弓射殺數人以巨斧擊鉤鉤皆斷折纜不  
能施韶人乃退翌日進逼其城城上望樓中有人罵隱言頗穢  
褻隱慙甚不敢左右章伏舵樓中引弓射罵者罵者應弦而斃  
舟中皆鼓譟時江水暴漲自清遠峽以北湍瀨尤惡糧運不繼  
會延昌父光稠自虔州擁兵來援隱與戰屢敗乃班師韶人以



兵襲我後遂捨舟而徒士卒不成列隱馬斃章以所乘馬援隱  
因徒行為後殿韶人不敢逼以功遷封州刺史充左右街使襲  
襲位命章典禁衛諸軍白龍中楚州遷舟師來伐圍封州敗我  
師於賀江溺死者千人龔乃遣章領神弩軍三千人戰艦百援  
之章至賀江沈鐵索水中兩岸設巨輪以挽索築連堤以隱之  
伏壯士堤中章以輕艦逆戰佯不利楚人逐之堤中挽輪舉索  
楚艦不能進退乃以強弩夾水射之楚人殲焉收戰船百艘以  
歸遂解封州之圍以功遷團練使童子五人俱為中郎將豪俠  
任氣所為不軌番禺號五郎將章年老不能致訓會有告其謀  
叛者逮捕下獄悉斬之章以功得不坐慙悻成疾大有十年卒

卷一萬八千一百  
三十七第三頁

吳懷恩

懷恩番禺人事龔為內府局丞性謹厚典宿衛二十餘年未嘗  
有小過玠襲位遷內常侍玠好宴樂東西兩教坊伶人千餘人  
嘗晝夜出入宮中懷恩屢言於玠曰今禁中自有簫韶府內樂  
百餘人皆善音律夜宴用此足矣焉用教坊若夜雜入禁中不  
拘闌籍恐姦人竊發不可不慎玠不聽未幾杲為陳道庠所弑  
晟襲位授宮闈諸衛押番乾和六年加開府儀同三司西北面  
招討使與指揮使吳珣領兵侵楚親冒矢石半歲間取梧桂六  
州之地以功加濮陽縣公大寶中王師取彬連銀懼以懷恩為



桂州團練使令治戰艦懷恩馭下方嚴臨事精至每舟成必自臨視材有良窳不等及制度疏畧不如法者必榜役工役者多怨之又造龍舟十以備銀親征舟成懷恩以綿幕其手徧捫鈎梢匠區彥希在側運斤斬之首墜船中左右皆驚走後數日擒彥希斬於市懷恩治兵嚴整所至輒有功及被害國人憂之一卷  
萬八千一百三十七第五頁

### 陳道庠

道庠潁川人父璫唐末避亂於封州力絕人隱聞其忠勇召至帳下隨隱入廣州遷雄虎將軍卒道庠幼俊爽起家為虎賁郎翹果有父風大有未給事晉王府龔疾亟命以道庠為元帥府

馬步軍都指揮使光天初張悟起循州大掠郡邑道庠與萬景忻從越王循王東征遇賊錢帛館賊圍之數重自辰至午我師殆盡道庠與景忻奮劍大呼殺十餘人賊衆披靡於是挾二王而出玠即位所為不法疑群弟圖己每宴集則令宦官守閣供奉將吏悉露索而後入及晟將為亂謀於道庠玠好角牴道庠因引多力者劉思潮等數人習角牴於晉王府中玠聞而悅焉翌日大置酒長春宮召角牴與諸王觀之至夕玠大醉既罷晟遣道庠等掖之因拉殺玠血濺寢門左右皆散走晟立以道庠為功臣領英州刺史出入宮中賞賜優厚既得志頗誅殺勳舊功臣劉思潮等皆相次被誅道庠不自安特進鄧伸與璫有舊



嘗遣道庠漢紀問其意伸咤曰慙獠此書有韓信彭越事審讀之道庠大懼遂謀亂事未發而晟覺之乃收道庠伸下獄翌日同斬於市悉夷其族

卷一萬八千一百三十七第六頁

### 邵廷瑁

廷瑁循州人幼為黃門給事禁中言論峭直與群閣異及長有文武材幹博覽書史尤善騎射玠襲位為內謁者遷內府局令總宿衛兵軍務嚴整尤重儒士有自遠方來者廷瑁必先見之為具貲糧而後引薦多被任用大寶中遷內常侍時銀春秋已長而未知稼穡荒於游宴人心危懼廷瑁每從容言曰男兒十五奪父志今宗社安危繫於陛下願加檢慎銀建禹餘宮在城

東南六十里山水奇絕銀避暑多往焉廷瑁雅所愛尚因請解兵職願為宮使銀從之而令典兵如故廷瑁以諸戎器不甚犀利弓弩不能及遠甲鎧銷薄不可以禦大敵乃為樣親督工匠造之累言於銀曰中國亂離久矣我先朝乘其間故有南越之地五十年來嶺表無事師之耳目不識旗鼓今中國已有真主陛下未嘗遣一介之使馳咫尺之書珠貝犀象瑇瑁翠羽積於內府歲久而不可較陛下未嘗以修聘一旦兵至何以禦之銀惜然不以為慮七年王師克彬州招討使暨彥贊戰死王師乘勝取連州銀始懼乃加廷瑁開府儀同三司東南面招討使以舟師屯沅口王師既退廷瑁撫循將士招輯亡叛境上肅然稱



為良將因繕治兵甲親加訓練將復彬連會同列者嫉之投匿名書言廷瑁將圖不軌銀信之遣使賜廷瑁死士卒排軍門爭入對使者哀訴言廷瑁無反狀請加考驗弗許軍民冤痛為立廟於沅口至今祀之

卷一萬八千一百三十七第四頁

### 潘崇徹

崇徹南海人事龔為內侍省局丞頗知書有鈴畧乾和中晟遣崇徹率兵攻彬州時江南將邊鎬據湖南發兵來援相遇於宜州崇徹令步將康崇保分兵為兩翼以掩賊江南兵大敗遂克彬州明年潭州節度使王逵率兵五萬來復彬州晟遣崇徹領眾赴之與逵遇於瓊石逵軍遠來罷乏不成列崇徹登塚而望

喜曰此成擒也乃縱兵擊之潭人大敗逵僅以身免桂州吳懷恩為部下所殺遣崇徹代領其眾加西北面招討使歲餘以飛語見疑於銀遣崇來覘其軍戒之曰崇徹果有異志即就誅之崇至崇徹知其意悉以所部兵自衛以見崇不敢發還以白銀曰崇徹日夕領伶官百餘人並衣錦繡吹玉笛為長夜之飲不恤軍政銀方怒會崇徹單騎來歸束身請罪銀釋而不問但奪其兵柄自是常怏怏及王師圍賀州刺史陳守忠告急於銀召大臣議皆請以崇徹領兵以拒王師崇徹難之辭以目疾銀怒曰何須崇徹伍彥柔獨無方畧耶乃以彥柔代領其眾彥柔至賀州為王師所擒賀州陷銀憂迫計無所出乃加崇徹



內大司馬步軍都統領衆三萬屯賀江會王師徑趨韶州崇徹但擁衆自保不為之援王師度馬徑崇徹請降從銀歸朝太祖知其事特赦崇徹以為汝州別駕卒

卷一萬八千一百三十七第四頁

### 郭崇岳

崇岳番禺人官媪梁鸞真之養子也幼為閩人以慧黠聞乾和中為內侍監銀襲位遷內侍中太微宮使大寶十二年王師來伐都統李承渥以全軍出韶陽為王師所敗銀震駭願諸將無可使者鸞真即薦其子可用乃以為招討使與大將植廷曉統衆六萬守馬遙去番禺纔百餘里時王師已過瀧頭翌日入馬遙去我寨十里游騎據雙女山直瞰我軍頻摩壘挑戰崇岳本

無將材所統之衆皆韶英敗卒絕無鬪志廷曉欲出戰崇岳不從但堅壁自守晝夜禱祀鬼神而已王師繼至廷曉謂崇岳曰北師乘席卷之勢其鋒不易當也吾士旅雖衆然皆傷痍舊卒今不驅策而前將坐受其斃亡無日矣於是領前軍據水而陣令崇岳殿後禦其奔衝既而王師濟水廷曉力戰而死崇岳奔入營王師攻之初一夕南風甚厲至是北風大起王師縱火燒寨崇岳大敗死於亂尸之下

卷一萬八千一百三十七第五頁

### 黃仁諷

仁諷建州浦城人少有武幹隸本城為鄉兵以陣敵立功累遷飛捷指揮使福州林仁翰殺連重遇送首於建安迎延政歸王



閩中時唐兵壓境不果行遣仁諷護送從子繼昌入守閩中以仁諷為福州在城鎮過使繼昌庸懦無馭下才人心不安會南兵逼建安將吏知其必破上下思亂仁諷因之遂與李仁達等同謀殺繼昌而自立延政大怒收仁諷妻子戮於市發兵討之時仁達已推立卓儼明令仁諷為城西軍帥以捍建兵仁諷知妻子已戮臨敵不顧出入奮擊建軍大敗退謂繼珣曰忠信仁義士之所守也舍此無以立吾頃在建安嘗攻伐今見利忘義不能慎守晚節是不忠也富沙託子於我不曾營救中道而變是無信也與建軍對敵所殺者皆鄉曲故人不仁也棄其妻子使為魚肉是不義也此身十沈九浮旦夕歸地下

何面目以見之因拊膺而哭繼珣曰大丈夫殺身殉名何顧妻子且置是事無輕泄也建軍既退左右以其言白仁達翌日擒殺之并殺繼珣

卷一萬八千一百三十七第七頁

### 許文禎

文禎泉州同安人少事審知為給使累歷內職袒襲位遷文思院使延義立改金吾使率兵屯臨汀未幾汀州刺史朱文進竊位以其黨黃紹頗守泉南而臨汀亦叛以應文進留從效殺紹頗以其首送建安文禎懼乃諭郡人歸欵於延政加太尉兼侍中為治嚴整賞罰必當吏民畏而愛之江南兵圍建州遣將時厚卿分兵攻汀州文禎率眾拒戰擒厚卿遣歸金陵因上表謝



稹上脫文字

罪及建州陷明年稹率軍吏赴金陵璟復以為汀州刺史未幾  
改蘄州召歸授建州刺史周顯德中王師圍壽春潘承祐薦文  
稹有武幹璟令統兵數萬攻紫金山為周師所破擒文稹世宗  
釋不誅璟割地歸欵世宗放文稹歸璟以其失律不復用歸同  
安坎壘而卒

卷一萬八千一百  
三十七第八頁

九國志卷九



禮記